

Erngup imerneqarsinnaasup pitsaassusia aamma imermik pilersuiviit nakkutigineqarnerat pillugit Namminersorlutik Oqartussat nalunaarutaat

Avatangiisit innarlitsaaliorneqarnissaannik Inatsisartut inatsisaanni nr. 9-mi, 22. november 2011-meersumi, § 10, imm. 1, nr. 12, 19 aamma 22, § 34, § 56, imm. 1, aamma § 66, imm. 3 naapertorlugit aalajangersarneqarput:

Kapitali 1

Atuuffii nassuiaatillu

§ 1. Nalunaarummi matumani aalajangersarneqarput:

- 1) Pitsaassutsikkut piumasaqaatit, imermut imerneqarsinnaasumut naammassineqarsimasussat.
- 2) Misissugassat suunersut, taakkununga imermi sukuluiagaanngitsumi imermilu imerneqarsinnaasumi misissugassanik tigusisarnerup misissueqqissaartarnerillu akulikissusissaat ilaatinneqarput.
- 3) Qanoq iliorluni erngup imerneqartartussap imermillu pilersuiviup pitsaassusaaq nakkutilliisoqarlunilu misissuisoqartassanersoq.
- 4) Piumasaqaatit suut, ilassutaasumik aalajangiisartunik misissueqqissaarnerni, nalunaarusiami matumani taaneqanngitsuni piumasaqaatigineqarsinnaanersut.

§ 2. Nalunaarummi matumani imeq imerneqarsinnaasoq, imermik pilersuivinnit nalinginnaasuniit allaniillu pilersuutigineqartoq pineqartoq.

Imm. 2. Atuuffiit tulluuttut imeq sukuluiagaanngitsoq- aamma imerneqarsinnaasoq nalunaarummut ilaatinneqanngillat, taakku inatsimmi allami ilaatinneqarmata:

- 1) Imeq sukuluiagaanngitsoq siunertanut, atuisut peqqissusaannut toqqaannartumik toqqaannanngitsumilluunniit sunniuteqartunut atorneqartoq, imaluunniit uumasunut imissatut atorneqartoq.
- 2) Imeq sukuluiagaanngitsoq imerlu imerneqarsinnaasoq, nakorsaatitut atorneqartoq.
- 3) Imeq imerneqarsinnaasoq, puiaasanut allanulluunniit poorlugu tuniniarneqartoq.

Imm. 3. Nalunaarummi imermut imigassamut piumasaqaatit imermut imaaneersumut imaluunniit imermut tarajoqanngitsumut, imermik imigassamik atuinissaq pillugu piumasaqaateqartoqarsimatinnagu, atuutinngillat.

§ 3. Nalunaarummi matumani imatut paasineqassapput:

- 1) Imeq imerneqarsinnaasoq:

Erngit qanorluunniit ittut, suliarineqarsimasut suliarineqarsimanngitsullu, imertut imerneqarsinnaasut, nerisassiornermut atorneqarsinnaasut, nerisassanik piareersaanermut angerlarsimaffimmiluunniit siunertanut allanut atorneqarsinnaasut, erngup suminngaanneernera apeqqutaatinnagu.

2) Imeq sukuluiaaganngitsoq: Imeq salinneqanngitsoq, pilerfimmunit qanoq ittuunera apeqqutaatinnagu pinngoqqaarnerminiilli imermik imerneqartussamik pilersitsinermi atorneqarsinnaasooq, taakkununngalu imeq tatsineersooq, imeq nunap iluaneersooq, imeq tarajulik aamma sersersuup sermitaanit aassimasumeersooq ilaatinneqarput.

3) Imermik tigooraaviit: Atortoq, imermik sukuluiaarneqanngitsumik, imilerivimmi imermik sukuluiaagassamik tigooraanermut atorneqartartoq. Imermik milluaanermut sukuluiaat assigiinngitsunik ilalinnik katitigaasimasinnaavoq, taakkununngalu qillerinerit, puilasuliat, sapusiat, erngup isaavia, imermik sukuluiaagassamik milluaaviit aamma erngup sukuluiaagassap aqputai ilaapput.

4) Imermik sukuluiaaviit: Sukuluiaavik, erngup imerneqarsinnaasut atorneqarsinnaanissaa siunertaralugu erngup sukuluiaagassap suliarineqartarfia. Imermik sukuluiaavik arlalinnik immikkoortoqarsinnaavoq, taakkununngalu imermut sukuluiaagassamut tankit, silaannalersuisarfiit, nakkartitsiviit (kiversaavik), minguaaviit, tappiorannartunik unerartitsiviit, uv-mik qinngortitsiviit, akuutissanik kemiskiusunik (klor, soda il.il.) akoorinermi uuttuiviit, imermut imerneqarsinnaasumut tankit, kuutsitsiviit, tarajuiaaviit aassisarfillu.

5) Imermik pilersuviit: Suliarinnittarfik ataatsimik arlalinnilluunniit matuma kinguliani taaneqartunik immikkoortortalik: Imermik milluaaviit, imermik sukuluiaaviit kiisalu erngup aqputai pingaarnerit. Imermik pilersuviit imermik milluaatinik arlalinnik sananeqaateqarsinnaavoq.

6) Imermik pilersuviit nalinginnaasut: Imermik pilersuviit, illoqarfinni nunaqarfinniluunniit imaluunniit pisortat suliaannut niuernermilluunniit tunngaveqarluni sulianut imermik imerneqarsinnaasumik pilersuisuusut, taakkununngalu suliffeqarfiit inuussutissanik avammut tunisassanik suliaqartut ilaatinneqarput.

7) Imermik pilersuviit allat: Imermik pilersuviit, imermik pilersuviit nalinginnaasunik taagorneqartut avataanniittut.

8) Erngup aqputai pingaarnerit: Erngup aqputai, imermik imerneqarsinnaasumik imermik sukuluiaavinniit imertartarfinnut, qatserisartut imermut atassusiisarfinit ikkuffinnullu pilersuisuusut.

9) Erngup aqputaanut ikkuffit: Erngup aqputai, erngup aqputaanit pingaarnermiit illup imermut atortulersuutaanut atassusiisut.

10) Illuni imermut atortulersuutit: Illup iluani silataaniluunniit atortulersuutit, imermik imerneqarsinnaasumik siaruarternermut atorneqartartut, taakkununngalu imermut tankit, ruujorit, katiterissutit, ventiilit kuutsitsiviillu ilaatinneqarput.

11) Ingerlatsinermik nakkutilliineq: Suliffeqarfiup iluani erngup pitsaassusaanik nakkutilliineq, akoorinermik nakkutilliineq nakkutilliinermilu suliniutit allat, ingerlatsisup sulisuisa kapitali 3-mit piomasagaatit naapertorlugit isumagisaat.

12) Ingerlatsinermi allattaaviit: Allattaaviit, ingerlatsisup ingerlatsineq pillugu paasissutissanik § 12-imi piomasarineqartunik ingerlaavartumik nalunaarsuiffigisai.

13) Ingerlatsisoq: Inuk imaluunniit inatsisilerisoq, imermik pilersuviup ingerlanneqarneranut akisussaasuusoq.

14) Imermik imerneqarsinnaasumik isumannaallisaanissamut pilersaarutit: Pinaveersaartitsinermut pilersaarutit, imaluunniit suleriaatsit, imermik imerneqarsinnaasumik milluaanermi, sukuluiaanermi

siauarterinermilu ulorianartorsiorfusinnaasunik suussusersinissamut annikillititsinissamullu siunertaqarfusut.

15) Nakkutilliinermi oqartussaasut: Avatangiisinut Naalakkersuisoqarfik.

Kapitali 2

Imermut sukuluiagassamut imerneqarsinnaasumullu piumasaqaatit kiisalu atortut imermut attuumasut

§ 4. Imerk sukuluiagassamik isumalluutit nutaat atorineqalernissaat sioqqullugu erngup sukuluiagassap pitsaassusia nakkutilliinermi oqartussaasunit akuerineqassaaq, ilanngullugu imermut sukuluiagassamut nutaamut misissugassat ilanngussaq 4-imi piumasarineqartut tunngavigalugit.

Imm. 2. Ingerlatsisup qinnuteqareerneratigut akuersissut tunniunneqassaaq, tassanilu erngup sukuluiagassap pisariaqanngitsumik peqqissutsimut pilersuinerulluunniit isumannaassusianut ulorianartorsioirtitsiviunngitsumik imermik imigassamik, ilanngussat 1-miit 3-mut pitsaassusissamut piumasaqaatinik naammassinnittumik, tunisassiornermut atorineqarnissaanissamut naammannissaa piumasarineqarpoq.

Imm. 3. Akuersissuteqarnermut atatillugu nakkutilliinermi oqartussaasut imermik sukuluiagassamik isumalluuteqarfissatut siunnersuutigineqartumik nakkutilliinermi oqartussaasut pisariaqartutut isumaqarfigisaannik misissuinissamik piumasaqarsinnaapput, taakkunungalu imermik sukuluiagassamik isumalluuteqarfiup eqqaani imermik isumalluuteqarfiup nunataata nunap assiliornissaa ilaatinneqarpoq.

Imm. 4. Ingerlatsisoq allaluunniit imm. 1 aamma 2 naapertorlugu akuersissummut annertuumik isumalimmik, tassungalu imeqarfiup killeqarfiup pioreersup allanngortinneqarnissaa ilanngullugu allannguinnissamut qinnuteqartillugu, nakkutilliinermi oqartussaasut pisariaqartutut isumaqarfigisaannik misissuinissamik piumasaqarsinnaapput, taakkunungalu imermik sukuluiagassamik isumalluuteqarfiup eqqaani imermik isumalluuteqarfiup nunataata nutaamik nunap assiliornissaa ilaatinneqarpoq. Nakkutilliinermi oqartussaasup taamatut allannguinnissamik qinnuteqartoq peqqusinnaavaat, misissuinerit ingerlanneqarnissaannut aningaasartuutitik matussuseeqqullugu.

§ 5. Imeq imerneqarsinnaasoq peqqissutsimut ulorianartorsioirtitsisinnaasutut annertussusilinnik eqimassusilinnillu tappiorannartoqassanngilaq akuutissanillu kemiskiusunik akoqassanani, aammalu minnerpaamik tappiorannartunut akuutissanullu kemiskiusunut tunngavissat malillugit pitsaassuseritassatut piumasaqaatinik, ilanngussaq 1-miit 3-mut allassimasunik malinniffussalluni.

§ 6. Imermi imerneqarsinnaasumi sumiiffinni ukunani pitsaassusissamut piumasaqaatit, § 5-imi taaneqartut malinneqassapput:

- 1) Imerk sukuluiaaviit, erngup aqquataanni pingaarnerni, imertartarfinni tamanit atorineqartuni, biilini imermut tankilinni aamma umiarsuarni imermut tankilinni erngup aniaviini.
- 2) Namminersortut pisortallu imermik kuutsitsiviini imertartarfinnilu allani erngup aniaviini.
- 3) Suliffeqarfinni inuussutissaleriffusuni sumiiffinni, suliffeqarfiup inuussutissanik tunisassiornerani imermik atuiffusuni.

§ 7. Atortut imermik imerneqarsinnaasumik suliaqarnermut siaruarterinermulluunniit atorineqartut, aammalu imermut imerneqarsinnaasumut attuumasut erngup pitsaassusiata ilanngussaq 1-miit 3-mut erngup pitsaassusianut piumasaqaatinut uniuuttumik ajorseriarneranik kinguneqassanngillat.

Imm. 2. Atortut imm. 1-imi taaneqartut Danmarkimi imaluunniit EU-mi nunami allami suliffissuaqarnermi malitassat naleqquttut naapertorlugit imermut imerneqartussamut atuussinnaanissamut akuerineqarsimassapput uppersarsaaserneqarsimassallutilluunniit. Aamma nakkutilliinermut oqartussat atortut imm. 1-imi taaneqartut suliffissuaqarnermi malitassat naapertorlugit akuerineqarsinnaanersut uppersarsaaserneqarsinnaanersullu aalajangiiffigisinnaavaat.

§ 8. Imermik pilersuivimmik ingerlatsisup ilanngussaq 1-miit 3-mut naapertorlugu imermik sukuluiaavinni, erngup aqputaani pingaarnerni, imertartarfinni tamanit atorineqartuni, biilini imermut tankilinni aamma umiarsuarni imermut tankilinni imermik pilersuivimmik ingerlatsisoq nakkutiginnittuusoq erngup aniaviinut pitsaassusissamut piumasaqaatit malinneqarnissaannut qulakkeerinissaq akisussaaffigaa.

Imm. 2. Misissugassanik tigussiffiusumi pitsaassusissamut piumasaqaatit pissutsinik ingerlatsisumut tutsinneqarsinnaanngitsunik, tassungalu pissutsinik illumik piginnittup § 9 naapertorlugu piumasaqaatinik malinnissimannginnera ilanngullugu, peqquteqartut ingerlatsisup imermik pilersuiffimmik misissuinerit uppersarsarsinnaappagit, ingerlatsisup imm. 1 naapertorlugu pisussaaffini naammassisimassavai.

§ 9. Illumik sukkulluunniit piginnittup illumi imermut atortulersuutit ikkuffiillu peqqussutit malillugit suliarineqarsimanissaat akisussaaffigaa. Tassunga ilanngullugu illumi imermut atortulersuutit ikkuffiilluunniit ilanngussaq 1-miit 3-mut erngup pitsaassusissaanut piumasaqaatit unioqquutillugit suliarineqarsimannginnissaannut qulakkeerinissamut illumik piginnittoq akisussaasuvoq.

Kapitali 3

Ingerlatsinermik nakkutilliineq ingerlatsinermilu allattaaviit

§ 10. Imermik pilersuivimmik nalinginnaasumik ingerlatsisoq erngup sukuluiaqassap erngullu imerneqarsinnaasup pitsaassusaannik misissuisarnermi nakkutilliinermut pilersaarusiussaaq, tassungalu ilanngussaq 7-mi piumasaqaatit naapertorlugit ingerlaavartumik uuttuisarnermut pilersaarut ilaatinneqassaaq.

Imm. 2. Ingerlatsinermik nakkutilliineq imermik sukuluiaanermut, kiisalu erngup sukuluiaqassap erngullu imerneqarsinnaasup pitsaassusaanik misissuinerup inernerinut naleqqussarneqartassaaq.

Imm. 3. Imermik imerneqarsinnaasumik pinaveersaartitsilluni illersuinissaq qulakkeerniarlugu, imermik pilersuivinni ingerlatsisut imermik pilersuivinni ataasiakkaani erngup imerneqarsinnaasup isumannaassusaanut 2025 nallertinnagu pilersaarusiussapput. Ingerlatsisut pilersaarutit immikkoortillugit suliarineqarnissaat aalajangersinnaavaat, imaluunniit ingerlatsinermik nakkutilliinermut atatillugu allagaatinut pioreersunut ilanngussinnaallugit. Kiisalu ingerlatsisut pilersaarutit annertussusaat imaallu najukkani pissutsit naapertorlugit allanngorartissinnaavaat, taakkunungalu imileriviup ilusiligaanera pisariussusialu, inuttat amerlassusaat, erngup pilersuutigineqartup annertussusia, tak. ilanngussaq 5, aamma erngup sukuluarneqanngitsup isumalluutaasup atorineqartup annertussusia ilaatinneqarput. Nakkutilliinermi oqartussaasut siuumoortumik ingerlatsisumik Nakorsaaneqarfimmillu suliamut

akuutitsilluni pilersaarutinit taakkununga sukumiinerusunik maleruagassiorsinnaapput.

Imm. 4. Imerk pilersuivimmik nalinginnaasumik ingerlatsisut aamma ilanngussaq 6 naapertorlugu erngup pitsaassusianut ingerlatsinermi nakkutilliinissamut pilersaarusoqqullugit nakkutilliinermi oqartussaasunit peqquneqarsinnaapput.

Imm. 5. Nakkutilliinermi oqartussaasut imermik pilersuivinnik allanik ingerlatsisut peqqusinnaavaat, ingerlatsinermi nakkutilliinermik, tunngavissanik erngup pitsaassusianut sunniuteqarsinnaasutut nakkutilliinermi oqartussaasut naliliiffigisaannik ilaqartinneqartunik pilersitseqqullugit.

§ 11. Erngup imerneqarsinnaasup pitsaassusiani nalunaarummi matumani piumasaqaatit malinneqanngitsut ingerlatsisup paasiguniuk, imaluunniit paasissutissat pioreersut naapertorlugit tamanna ilimagineqarpat, ingerlatsisup erngerluni nakkutilliinermi oqartussaasunut ilisimatitsinissaq qulakkiissavaa.

§ 12. Imerk pilersuivimmik nalinginnaasumik ingerlatsisoq ingerlatsinermi allattaavimmut allattuisassaaq. Uttuinerit ilanngussaq 7-imi taaneqartut inernerit aamma ukununga paasissutissat ingerlatsinermi allattaavimmut allanneqartassapput:

- 1) soda-t chlor-it, akuutissat calcium-itallit uumasuaajaatillu akuliunneqartut annertussusaat,
- 2) imermik pilersuivimmi misissuinerit,
- 3) imermik pilersuivimmi ajornartorsiutaasinnaasut, aamma
- 4) allat, erngup pitsaassusianut erngullu atuisunut suliffissuarnullu inuussutissalerivinnut siaruarterneqartup annertussusianut isumaqartut.

Imm. 2. Ingerlatsinermi allattaaviup naqitanngorlugu elektroniskinnorluguluunniit sivikinnerpaamik ukiuni tallimani pissarsiarineqarsinnaanissaa qulakkeerneqassaaq.

Imm. 3. Ingerlatsinermi allattaavimmut nalunaarsuinermi pappiaraq atorineqarpat, taanna ingerlatsisumit taassumaluunniit sinniisaanit atsiorneqassaaq. Ingerlatsinermi allattaavimmut nalunaarsuinermit atortut elektroniskiusut atorineqarpata, kikkut allattaavimmut naqiterisuunersut allanneqartassaaq, taamatullu allattaaviup naqinneqarnerani atsiortoqassalluni.

Imm. 4. Nakkutilliinermi oqartussaasut ingerlatsisoq akuutillugu ingerlatsinermit allattaavinnut piumasaqaatinut tapiliussanik aalajangersaasinnaapput.

§ 13. Imerk pilersuivimmik nalinginnaasumik ingerlatsisup nakkutilliinermit oqartussaasut piumasaqarnerisigut saqqummiussinnaassava:

- 1) Ingerlatsinermit allattaavik.
- 2) Imermut aqquteqarfinnut naaffiusinnaasunulluunniit takussutissiaq, imermik misissugassamik tigussiffiusut pillugit paasissutissartalik.
- 3) Ingerlatsinermit paasissutissat aamma teknikki atorlugu eqqiluisaarnermut paasissutissat, tappiorannartunik misissuinermit aallaaviusunik sumiissusersiornissamut isumaqartut.

Kapitali 4

Nakkutilliineq, misissugassanik tiguisarneq ulorianartorsiornernillu naliliisarneq

§ 14. Nakkutilliinermi oqartussaasut imermik pilersuivinnik nalinginnaasunik nakkutilliisuupput.

Nakkutilliinermi pineqarput:

1) Erngup imerneqarsinnaasup tappiorannartunut killigititassanik ilanngussaq 1-imi taaneqartunik akoqarnera, ilanngussaq 5-imi imermik misissugassanik tiguisarnerit misissueqqissaartarnerillu akulikissusaannut naapertuuttumik.

2) Erngup imerneqarsinnaasup kemiimut tunngasunut arrorsinnaasunut arrorsinnaanngitsunullu killissarititassanik ilanngussaq 2 aamma 3-mi taaneqartunik akoqarnera, ilanngussaq 5-imi imermik misissugassanik tiguisarnerit misissueqqissaartarnerillu akulikissusaannut naapertuuttumik, kiisalu ilanngussaq 7 naapertorlugu ingerlatsinermik nakkutilliineq tunngavigalugu.

3) Imermik pilersuviit, taakkununga imeqarfiit ilusiligaaneri, atuuffi aserfallatsaaliugaanerisalu pitsaassusaat ilanngullugu.

Imm. 2. Nakkutilliinermi oqartussaasut aamma imermik pilersuivinnik allanik nakkutilliisinaapput, tassungalu nakkutilliinermi oqartussaasut erngup imigassap ilanngussaq 1-miit 3 ilanngullugu pitsaassusissamut piumasaqaatinut naammassinninginneranik isumaqarnissamut tunngavissaqarnerat ilaatinneqarpoq.

Imm. 3. Ingerlatsisup nakkutilliinermi oqartussaasut qinnuteqarnerisigut pissutsit imm. 1-imi taaneqartut pillugit paasissutissat, nakkutilliinerup naammassinissaanut pisariaqartinneqartut tamaasa tunniutissavai.

§ 15. Nakorsaaneqarfik ilanngussaq 1-miit 3 ilanngullugu pitsaassusissamut piumasaqaatinut aamma ilanngussaq 4 aamma 5-imi misissuisarnerup akulikissusissaanut atatillugu, kiisalu § 19, imm. 3-4-mi ajutoorfusinnaasunik naliiisarnermut aalajangersakkanik atuilluni nakkutilliinermi oqartussaasunut siunnersuisassaaq.

§ 16. Ingerlatsisoq ilanngussaq 4-mi erngup sukuluiaqassap aamma ilanngussaq 5-imi erngup imerneqarsinnaasup tappiorannartunik akoqarneranik killissarititaasunik taaneqartunik misissuisarnermi akulikissutsinut tunngavissat, ilanngussaq 1-imi taaneqartut naapertorlugit misissugassanik tiguisassaaq misissueqqissaartassallunilu.

Imm. 2. Ingerlatsisoq ilanngussaq 4-mi erngup sukuluiaqassap aamma ilanngussaq 5-imi erngup imerneqarsinnaasup kemiimut tunngasunut arrorsinnaasunut arrorsinnaanngitsunullu killissarititassanik, ilanngussaq 2 aamma 3-mi taaneqartunik akoqarneranik killissarititaasunik taaneqartunik misissuisarnermi akulikissutsinut tunngavissat naapertorlugit misissugassanik tiguisassaaq.

Imm. 3. Ingerlatsisup imermik misissugassatut tigusanik, imm. 1-imi aamma 2-mi taaneqartunik laboratoriamut, qitiusumik nakkutilliinermi oqartussaasunit misissuinissamut akuerisamut misissoqqissaagassanngorlugit nassiussinissaq akisussaaffigaa.

Imm. 4. Erngit misissugassat inunnit tamatumunga ilitersuunneqarsimasunit tiguneqartassapput.

Imm. 5. Imermik misissugassamik tigusarneq ilanngussaq 4-mi ISO-mut pitsaassutissatut taaneqartunut piumasaqaatit naapertorlugit suliarineqartassaaq. Aamma imermik misissugassamik tigusarnermi imermik misissugassamik tigusarnermut ilitersuutit, laboratoriamit suliaqartussamit suliarineqartut malinneqartassapput, tassanili taamaallaat imermik misissugassamit tigusat, periaatsit allat imm. 7-imi taaneqartut atorlugit misissoqqissaarneqartussat pineqanngillat.

Imm. 6. Imm. 1-5-imut imermit misissugassatut tigusanit misissoqqissaakkat uuttukkallu, imermik pilersuivimmi nalinginnaasumi ingerlatsisumit kapitali 3 naapertorlugu ingerlatsinermik nakkutilliinermut

atatillugu suliarineqartut ilaatinneqanngillat. Kisiannili nakkutilliinermi oqartussaasut misissueqqissaarnernut uuttuinernullu taakkununga, kiisalu ingerlatsisup ingerlatsinermik nakkutilliinerata pitsaassusissaannut sukkulluunniit piumasaqaateqarsinnaapput.

Imm. 7. Nakkutilliinermi oqartussaasut imermik misissugassanut imm. 1-imi aamma 2-mi taaneqartunut misissueqqissaareriaatsit allat, nakkutilliinermi oqartussaasunit akuersissuteqarfigineqartut atorlugit misissoqqissaarneqarnissaannut akuersissuteqarsinnaapput, tassungalu pissutsit ingerlasussanik piareersaanermi aqutsinermilu ajornartorsiuteqartoqarnera peqqutaalluni imermik misissugassat, ISO-mut pitsaassuserititassat ilanngussaq 8-mi taaneqartut atorlugit misissoqqissaarneqarnissaannut piffissarititaasut malinneqarsinnaasannginnerat ilaatinneqarpoq.

Imm. 8. Imm. 7 naapertorlugu akuersissuteqartoqassanersoq naliliinermi, misissueriaatsinik allanik atuinerup erngup imerneqarsinnaasup pitsaassusaanik ajorseriartitsinnginnissaa, tassungalu ilanngullugu misissuisarnerup annertusineqarnissaa imaluunniit tutsuiginarnerusumik misissuisoqartarnissaa pingaartinneqassaaq. Taamatuttaaq imermik pilersuivimmi pineqartumi erngup imerneqarsinnaasup isumannaassusissaanut pilersaarusiortoqarnissaa pingaartinneqartussaavoq.

Imm. 9. Imermik pilersuivimmut, imermik inuussutissanik suliffeqarfinnut avammut tuniniagaqartunut pilersuisunut imm. 7 naapertorlugu akuersissuteqartoqarsinnaanngilaq. Imermik pilersuivinni taakkunani periaatsit allat, imm. 7-imi taaneqartut taamaallaat imermik misissugassanik tapertaasunik, nalunaarummi matumani misissugassanik tiguisarnermi piumasaqaatit atuuttussat naammassiniarlugit tiguneqanngitsunik misissueqqissaarnermut atorneqarsinnaapput.

Imm. 10. Ingerlasussanik piareersaanikkut ajornartorsiuteqarnermi ISO-mut pitsaassuserititassani ilanngussaq 8-mi taaneqartuni piffissamut killissaliussat naammassineqarnissaat periarfissaqanngippat, tamanna misissueqqissaarnerup tutsuiginassusaanut sunniissasoq naliliisoqarsimanngippat, nakkutilliinermut oqartussaq piffissamut killiliussanik sivisunerusunik aalajangersaasinnaavoq. Piffissamut killiliussat sivisunerusut taamaattut imermik pilersuivinnut, inuussutissalerinermut suliffeqarfinnut avammut nioqquteqartartunut pilersuisunut, aalajangersarneqarsinnaanngillat.

§ 17. Ingerlatsisup nakkutilliinermi oqartussaasut piumasaqarnerini imermik pilersuivimmi imermik misissugassamik tiguisiffusut pillugit ilisimatitsissuteqassaaq.

§ 18. Ingerlatsisup sukkulluunniit nakkutilliinermi oqartussaasut erngup pitsaassusaanik misissuinissamut imermik misissugassanik nalinginnaasunik taamatullu tapertaasunik tiguisinnaatissavai, kiisalu imeqarfimmut isersinnaatissallugit, taakkunungalugu imeqarfiup ilusiligaanerani ingerlanneqarnerinillu misissuisarnerit ilaapput.

§ 19. Ingerlatsisup imermik misissugassamik tigusinissamut piffissat aalajangersassavai, taamaalilluni ukioq kaajallallugu, tassungalu ukiuunerani, upernaakkut nunap kuuffiani, aasaanerani aammalu ukiakkut sikunnginnerani erngup pitsaassusianik misissueqqissaarnerup inernerinik saqqummiussisoqarsinnaassalluni.

Imm. 2. Imermik misissugassamik tiguisarnerit sapinngisamik piffissaq sumiiffillu eqqarsaatigalugit assigiiartumik agguarneqassapput. Taamaattumik misissuinerup ingerlanneqarnissaanut aqqusersuutini kaaviiaartumik tiguisiffissat arlallit toqqarneqassapput.

Imm. 3. Nakkutilliinermi oqartussaasut ingerlatsisup qinnuteqarneratigut ilanngussaq 4-mi aamma 5-imi

misissugassanik tiguisarnerup akulikissusiinik ikilitsinissamik aalajangiinnaapput. Kiisalu nakkutilliinermi oqartussaasut kemiimut tunngavissamik ilanngussaq 2-mi aamma 3-mi taaneqartumik ataatsimik amerlanerusunilluunniit missuinnginnissamik aalajangiinnaapput.

Imm. 4. Imm. 3 naapertorlugu aalajangiinermi ilanngussaq 9-mi piumasaqaatit naapertorlugit ulorianartorsiorfinnik naliliinissaq pisariaqartinneqarpoq. Ulorianartorsiorfinnik naliliineq kommuninut pineqartunut imermullu imigassamut suleqatigiissitami § 33-mi taaneqartumi ilaasortanut allanut siumoortumik tusarniaassutigineqareernermini nakkutilliinermi oqartussaasunit akuerineqassaaq.

Imm. 5. Nakkutilliinermut oqartussap sioqutsisumik ingerlatsisumut aamma Nunatsinni Nakorsaaneqarfimmut tusarniaaerluni, erngup imigassap pitsaassusaa qulakkeerniarlugu tamanna pisariaqartoq nakkutilliinermut oqartussaq naliliitillugu, ilanngussaq 4-mi aamma 5-mi misissuisarnerup akulikissusissai sivitsortissinnaavai.

Imm. 6. Najukkami imermik pilersuinermi pissutsini pisariaqartinneqarpat, nakkutilliinermi oqartussaasut ingerlatsisumut aamma Nunatsinni Nakorsaaneqarfimmut tusarniaaerluni, ilanngussaq 1-miit 3-mut killissarititaasut saniatigut tappiorannartunut kemiimullu killissarititaasut allattorsimaffiat annertusisinnaavaat, taakkunungalu ilaapput:

- 1) Imermik sukuluarneqanngitsumik misissuinerup inerner.
- 2) Akuutissanik kemiskiusunik imaluunniit tappiorannartunik, peqqissutsimut ulorianartorsiortitsinnaasunik peqarnera ilimagineqarpat.
- 3) Siornatigut misissuinerusimasut inerner.
- 4) Imermik pilersuiviup immikkut ittumik mingutsinneqarnera, taakkunungalu atortut tunisassiallu imermut attuunnerini tuniluutsitsineq ilaavoq.
- 5) Pissutsit allat tamatumunnga tunngaviliippata.

Imm. 7. Misissugassanik tiguisarnerit akulikissusaannut tunngavissat, imm. 6 naapertorlugu ilaliunneqartut najukkani pissutsit tunngavilugit aalajangersarneqartassapput.

Imm. 8. Imermik pilersuivinnik nalinginnaasunik ingerlatsisut nakkutilliinermi oqartussaasunit imermit kemiimut tunngasunik tappiorannartoqassutsinillu misissuiffigineqartussanik tiguisarnermi pilersarusiornissamut peqquneqarsinnaapput. Nakkutilliinermi oqartussaasut misissugassanik tiguisarnermi pilersaarutit taakku imassaannut sukumiinerusunik piumasaqarsinnaapput, tassungalu ilanngullugu misissugassat tiguneqartussatut pilersaarutaasut amerlassusilerneqarnissaat, kiisalu ukiup qanoq ilinerani tiguisoqartarnissaa tigusiiffusussallu sumiinnissaanut piumasaqaateqartoqarsinnaavoq.

Imm. 9. Nakkutilliinermi oqartussaasut ingerlatsisumik suliffeqarfinnillu inuussutissaleriffiusunik avammut tuniniagaqartunik suleqataatitsillutik, ilanngussaq 1-miit 3-mut killissarititaasut tappiorannartunut kemiimullu killissarititaasut allattorsimaffiat annertusisinnaavaat, kiisalu inuussutissanik avammut tuniniagaqarnerup eqqarsaatigineqarnerani tamanna tunngavissaqarpat, ilanngussaq 1-miit 3 ilanngullugu killissarititaasunut taaneqartunut piumasaqaatit sakkortusisinnaallugit. Taamatut allannguisoqassappat, ingerlatsisoq annertuunik aningaasartuuteqartinneqannginnissaa pisariaqarpoq.

§ 20. Ingerlatsisup imermik misissugassamik tigusinermut, laboratoriamut nassiussinermut aammalu tappiorannartunut killissarititaasunik § 16, imm. 1-mi taaneqartunik misissueqqissaarnermut aningaasartuutit akilissavai.

§ 21. Laboratoriat, misissoqqissaagassat kemiimut tunngasut inerner, erngup sukuluiagaangitsup erngullu imerneqarsinnaasup pitsaassusianik naliliinissamut atugassat piareerpata, erngerluni nakkutilliinermi oqartussaasunut aamma ingerlatsisumut nalunaarutigissavaat.

Imm. 2. Laboratoriat, misissoqqissaagassat tappiorannartoqassutsumut tunngasut inerner, erngup sukuluiagaangitsup erngullu imerneqarsinnaasup pitsaassusianik naliliinissamut atugassat piareerpata, erngerluni nakkutilliinermi oqartussaasunut, Kalaallit Nunaanni Nersutaateqarnermut Inuussutissalerinermullu Oqartussaasunut, ingerlatsisumut suliffeqarfinnullu inuussutissalerinermik suliaqartunut, avammut tuniniagaqartunut kalluarneqarsimasinnaasunut nalunaarutigissavaat. Aamma imermik, suliffeqarfinnut inuussutissalerinermik suliaqartunut, avammut tuniniagaqartunut pilersuutaasumik misissueqqissaarnerup inerner Danmarkimi Inuussutissaqarnermut Aqutsisoqarfimmut nalunaarutigineqassapput.

Imm. 3. Aamma laboratoriat, misissueqqissaarnerup inerner imm. 1-imi aamma 2-mi taaneqartut piareerpata, paasissutissanik katersuivimmut nakkutilliinermi oqartussaasut toqqagaannut naqiterlugit immiutissavaat. Inernerit naqitikkat Nakkutilliinermi oqartussaasunit akuerineqassapput.

Imm. 4. Misissueqqissaareriaatsit allat, § 16, imm. 7-imi taaneqartut atorineqassappata, misissueqqissaarnerup inerner inummit, nakkutilliinermi oqartussaasut misissueqqissaarnernut akisussaasutut toqqagaannit nalunaarutigineqartassapput.

Kapitali 5

Nalunaaruteqartarnej

§ 22. Iermik pilersuivimmik nalinginnaasumik ingerlatsisoq ukiumut ataasiarluni imermik pilersuivimmi pineqartumi erngup imerneqarsinnaasup pitsaassusia pillugu nalunaarusiortassaaq. Nalunaarusiaq ukiumi ilivitsumi tullermi kingusinnerpaamik juunip ulluisa aallaqqaataanni nakkutilliinermi oqartussaasunut nassiunneqassaaq.

Imm. 2. Nalunaarusiaq uku pillugit paasissutissanik imaqassaaq:

- 1) erngup pitsaassusia,
- 2) imermik pilersuiviup imermik pilersuutaasussap annertussusia eqqarsaatigalugu pisinnaasai,
- 3) erngup siaruarternegartup annertussusia,
- 4) innuttaasut amerlassusaat,
- 5) §§ 34-37 naapertorlugit immikkut ittumik akuersissutit tunniunneqartut, aamma
- 6) imermik pilersuivimmi, nalunaarut manna naapertorlugu pitsaassusissamut piumasaqaammik ataatsimik amerlanerusunilluunniit naammassinniffiunngitsumi pitsaassusissanut piumasaqaatit malinniarlugit iliuusissatut pilersaarutigineqartut.

§ 23. Nakkutilliinermi oqartussaasut ukiut tallimakkaarlugit ukiuni ilivitsuni qaangiuttuni tallimani erngup pitsaassusianut tunngatillugu eqikkaaffusumik nalunaarusiortassapput. Nalunaarusiaq ukiup ilivitsup ingerlanerani, piffissap nalunaarusiorfissap atuuffigisaata naannginnerani tamanut ammasumik saqqummiunneqassaaq.

Kapitali 6

Peqqussuteqarnerit il.il.

§ 24. Nakkutilliinermi oqartussaasut ingerlatsisoq peqqusinnaavaat, erngup pitsaassusianik aammalu pitsaassutsip apparneranut peqqutaasunik sukumiisumik misissueqqullugu:

- 1) ilanngussaq 1-miit 3-mut naapertorlugit erngup imerneqarsinnaasup pitsaassusissaannut piumasaqaatini ataaseq unioqqutinneqarsimappat, imaluunniit tamanna pillugu pasitsaassisoqarsimappat, aamma
- 2) erngup imerneqarsinnaasutut atorineqarnerani peqqissutsimut ulorianartorsiortitsisoqarsinnaasoq naliliisoqarpat.

§ 25. Nakkutilliinermi oqartussaasut ingerlatsisunut peqqussuteqarsinnaapput, aammalu akuutissanik tappiorannartunillu misissuisarnermi pitsaassutsimut piumasaqaatinut tapiliussanik, nalunaarummut matumunnga ilanngussami aalajangersarneqanngitsunik aalajangersaasinnaallutik, akuutissat tappiorannartullu taamaattut peqqissutsimut ulorianartorsiorfusinnaallutik amerlassuseqartut eqimassuseqartulluunniit naliliisoqarpat.

Imm. 2. Nakkutilliinermi oqartussaasut pisariaqartitsisoqarneranik naliliinerminni, imermik misissugassamik tiguisarfinnik nutaanik aalajangersaasinnaapput aammalu imermik misissugassamik tiguisarfiit allanngortissinnaallugit.

§ 26. Nakkutilliinermi oqartussaasut erngup imigassap pitsaassusaanut qulakkeerinissamut imaluunniit iluarseeqqinnissamut ukuninga aallartitseqqullugit ingerlatsisunut peqqusisinnaapput:

- 1) Erngup imerneqarsinnaasup qulakkeernissaanut iliuuserigallagassat.
- 2) Erngup imerneqarsinnaasup pitsaassusiata piujuartussamik iluarseeqqinnissaanut iliuutsit pitsannguiffusut.

Imm. 2. Imm. 1 naapertorlugu peqqussutit tunniunneqarsinnaapput, erngup imerneqarsinnaasup pitsaassusissaanut ilanngussaq 1-miit 3-mut naapertorlugu piumasaqaatit malinneqarsimanngippata, kapitali 4 naapertorlugu nakkutilliinermi misissugassanilluunniit tigusinermi, imaluunniit § 10 naapertorlugu ingerlatsinermik nakkutilliinermi imermik imerneqarsinnaasumik atuineq peqqissutsimut ulorianaateqarsinnaasoq takussutissaqarpat, imaluunniit allanik peqquteqartumik erngup pitsaassusaata qulakkeernissaanut imaluunniit iluarseeqqinnissaanut peqqusissuteqarnissaq pisariaqartoq naliliisoqarpat.

Imm. 3. Taamatuttaaq erngup imigassap pitsaassusaani ajornartorsiuteqalernissap pitsaaliornissaanut pisariaqartoq naliliisoqartillugu, nakkutilliinermut oqartussaq ingerlatsisumut peqqusissuteqarsinnaavoq.

§ 27. Peqqussutit §§ 24-26-mi taaneqartut aamma illumik piginnittumut tunniunneqarsinnaapput, nakkutilliinermi oqartussaasut illup pineqartup imermut atorulersuutai ikkuffiluunniit pisuullutik imermut imerneqarsinnaasumut piumasaqaat ataaseq amerlanerusulluunniit illumi malinneqarsinnaanngitsut qularinngippassuk.

§ 28. Nakkutilliinermi oqartussaasut iluarsiissutissanik pisariaqartinneqartunik iliuuseqarnissap aallartinneqarnissaata tungaanut, imermik pilersuiviup imaluunniit illup imermut imerneqarsinnaasumut atoruinik atuinermik killiliisinnaapput, tassungalu ilanngullugu erngup atorineqarnera peqqissutsimut ulorianaateqarsinnaasoq naliliisoqarpat qalaassinissamik inassuteqarsinnaallutik.

Imm. 2. Imm. 1-ip atorineqarnerani eqqarsaatigineqassapput:

- 1) imermik imerneqarsinnaasumik atuineramik unitsitsinermut killilersuinerulluunniit atatillugu peqqissutsimut ulorianartorsiorsinnaaneq, tassunga ilanngullugu atuisut imermik imerneqarsinnaasumik qalaassinerannut atatillugu ulorianartorsiorfusinnaasut,
- 2) atuisunut eqqorneqartunut ilitersuinissaq paasititsinissarlu,
- 3) inerteqquteqarnerup killilersuinerulluunniit atuunnerani imermik imerneqarsinnaasumik pilersuineramik allamik pilersitsinissamut periarfissat,
- 4) tappiorannartoqassutsimut imaluunniit kemiimut pitsaassusissatut piumasaqaat piumasaqaatilluunniit, atuinerup killilersorneqarneranut peqqutaasut, aamma
- 5) qaangiinnermut peqqutaasoq qanoq annertutiginersoq, tassungalu ilanngullugu ukiup qanoq ilinera apeqqutaatillugu imermik sukuluiagaanngitsumik isumalluuteqarfimmi bakteriat annikinnerusumik amerlinerat imaluunniit imermik errortuutikumik imermik pilersuivimmu annertunerusumik kuuttoqarnera.

Imm. 3. Atuineramik killiliineq pillugu nalunaaruteqartoqarsinnaavoq, ilanngussaq 1-miit 3-mut naapertorlugu imermut imerneqarsinnaasumut pitsaassusissatut piumasaqaat malinneqarsimanngippat, imaluunniit kapitali 4 naapertorlugu nakkutilliineq misissugassanillu tigusineq imaluunniit § 10 naapertorlugu ingerlatsinermik nakkutilliineq imermik imerneqarsinnaasumik atuinerup peqqissutsimut ulorianaateqarsinnaanerani tikkuussippata.

Imm. 4. Atuineramik killiliinissaq taamaallaat imermik imerneqarsinnaasumik imerneq peqqissutsimut ulorianaateqarsinnaasoq pillugu naliliineq tunngavigalugu aalajangerneqarsinnaavoq, nakkutilliinermilu oqartussaasut allamik aalajangiingippata tamanna suliffeqarfiit inuussutissanik suliaqartut tunisassiornerminni imermik atuinerannut attuumassuteqanngilaq.

§ 29. § 28 naapertorlugu atuineramik killiliinissamut aalajangiinerit Nakorsaaneqarfimmut tusarniaareernikkut pisassapput. Tusarniaaneq oqaasiinnaat atorlugit taamatullu allakkatigut pisinnaavoq, suliap nukingernartuunera apeqqutaatillugu. Oqaasiinnaat atorlugit tusarniaaneq sapinngisamik piaartumik allakkatigut uppersaammik malitseqartinneqassaaq.

§ 30. Nakorsaaneqarfiup nakkutilliinermi oqartussaasut peqqusinnaavai, imermik pilersuivinnik nalinginnaasunik allanillu immikkut ittumik misissueqqullugit, kiisalu ikkuffinnik illunilu imermut atortunik misissueqqullugit, imermik pilersuivinnit imaluunniit atortunit taakkunannga imermik atuneq peqqissutsimut tunngatillugu piaartumik iluarsisarialimmik ulorianaateqarsinnaasoq naliliisoqarpat.

Kapitali 7

Atuisunut paasissutissiisarneq

§ 31. Nakkutilliinermi oqartussaasut atuineramik killilersuisoqassappat, tassunga ilanngullugu qalaassinissamik innersuussisoqassappat tusagassiorfinnut nalunaaruteqassapput.

§ 32. Ingerlatsisup nakkutilliinermi oqartussaasut atuineramik killiliinerannik ingerlatsitseqqivigissallugit, taakkunungalugu ilaapput qalaassinissamik inassuteqaateqarnerit, taamatullu paasissutissat assigisaat allat, nakkutilliinermut oqartussap ingerlateqqeqqullugit ingerlatsisumut piumasarisai. Taakkua

ingerlateqqinneqarnerat qanoq ingerlanneqassanersoq nakkutilliinermut oqartussaq erseqqinnerusunik piumasaqaateqarsinnaapput.

Kapitali 8

Imermut imerneqarsinnaasumut suleqatigiissitaq

§ 33. Nakkutilliinermi oqartussaasut imermut imigassamut suleqatigiissitamik pilersitsissapput.

Imm. 2. Imermut imerneqarsinnaasumut suleqatigiissitaq ataatsimoorluni siunnersuisarfiuvoq, nakkutilliinermi oqartussaasunut siunnersuisarnermik siunertaqartoq.

Imm. 3. Suleqatigiisitaliap pisariaqartitsitillutik nakkutilliisut Peqqissutsimut Naalakkersuisoqarfimmit, Kalaallit Nunaanni Nersutaateqarnermi Inuussutissalerinermilu Oqartussaasunit, Nakorsaaneqarfimmit, imermik pilersuivinnik nalinginnaasunik ingerlatsisunit, kommuninit aamma suliffeqarfinnit inuussutissanik avammut tuniniagaqartunit ilaasortaataitaqartunut qaaqquisinnaapput. Nakkutilliisuttaaq ataatsimiinnermut attuumassuteqartut allat aamma aggersarsinnaatitaavaat.

Imm. 4. Nakkutilliinermi oqartussaasut siulittaasuutitaqarneq allattoqarfeqarnerlu isumagissavaat.

Imm. 5. Nakkutilliinermi oqartussaasut ataatsimiinnerit amerlassusissaannik aalajangiisassapput. Ataatsimiinnernut peqataanissaq nammineerluni piumassutsimik tunngaveqassaaq.

Kapitali 9

Immikkut ittumik akuersissuteqartarneq

§ 34. Nakkutilliinermi oqartussaasut imermik pilersuivimmik ingerlatsisup qinnuteqarneratigut arrorsinnaanngitsunut killissarititassatut pitsaassutsimut piumasaqaatit, ilanngussaq 2-mi aalajangersarneqartut saneqqunneqarnissaannut immikkut ittumik akuersissuteqarsinnaapput. Taamatut saneqqutsinissamut immikkut ittumik akuersissuteqarnissamut erngup pitsaassusiata ilanngussaq 2-mi piumasaqaatinut naapertuuttunngorlugu piaartumik iluarsiiarluni iliuuseqartoqarnissaa piumasaqaatigineqarsinnaavoq.

§ 35. § 34 naapertorlugu immikkut ittumik akuersissuteqartoqassappat, iluarsiiarluni iliuusissat pisariaqartut isumaginissaannut pilersaarummik saqqummiussisoqarnissaa piumasarineqarpoq.

Imm. 2. Taamaallaat piffissamut, iluarsiiarluni iliuusissat pisariaqartut suliarineqarnissaannut pisariaqartinneqartumut immikkut ittumik akuersissuteqartoqarsinnaavoq.

Imm. 3. Taamaallaat pitsaassutsimut piumasaqaatit allatut iliorluni naammaginantumik malinniarneqarsinnaanngippata, erngup akuisa qaffasinnerannut akuersissuteqartoqarsinnaavoq. Tassunga ilanngullugu imermik pilersuivimmi iluarsaassinernik assigisaannilluuniit suliaqarnermut atatillugu erngup akuisa qaffasinnerinut akuersissuteqartoqarsinnaavoq.

Imm. 4. Nakkutilliinermi oqartussaasut immikkut ittumik akuersissummik nalunaaruteqarnerminni, qaangiinissat immikkut ittumik akuersissuteqarnermi akuerineqartut qanoq annertutiginnissaannut qaffasinnerpaaffiliisussaapput. Killissarititaasut taakku aalajangiiffigineqarnerini, immikkut ittumik akuersissutip peqqissutsimut ulorianartorsiortitsinnginnissaa isumagineqassaaq.

Imm. 5. Ingerlatsisup immikkut ittumik akuersissutip tiguneqarnerani erngerluni imermik pilersuivimmik atuisut immikkut ittumik akuersissuteqartoqarnera pillugu, aammalu tamatumani piumasaqaatit pillugit

ilisimatissavai.

Imm. 6. Immikkut ittumik akuersissutit sivisunerpaamik ukiut pingasukkaarlugit atuuttussanngorlugit nalunaarutigineqarsinnaapput.

§ 36. Immikkut ittumik akuersissuteqartoqarnissaanik qinnuteqaat paasissutissanik imaattunik imaqassaaq:

- 1) Immikkut ittumik akuersissuteqartoqarnermut peqqutaasut sivisussusissaallu.
- 2) Erngup pitsaassusissaanut piumasaqaatit atuuttut, siornatigut misissueqqissaarnerup inernerit attuumassuteqartut aamma erngup pitsaassusissaanut piumasaqaatit atuuttut saneqqunneqarnissaasa annertussusissaannut naatsorsuutigisat.
- 3) Nunami sumiiffik, imermut sukuluarneqanngitsumut isumalluutit attuumassutillit, erngup ullormut pilersuutaasartup annertussusia, pilersuineq nalunaarsorlugit, innuttaasunut aamma suliffeqarfinnut inuussutissaleriffiusunut agguarlugit.
- 4) Erngup pitsaassusianik nakkutilliinermi misissuisarnissamut pilersaarut, nakkutilliinermi oqartussaasut suleqatigalugit suliarineqartoq, iliuusissanik piffissap immikkut ittumik akuersissuteqarfusup atuunnerani aalajangiiffigineqartussanik imalik, tassungalu misissuisarnerup akulikinnerusinnaanera ilaatinneqarpoq.
- 5) Erngup pitsaassusianik qulakkeeriniarluni iluarseeqqinniarniluunniit iliuusissat pitsannguutaasussat pisariaqartinneqartut aallartinnissaannut piffissamut suliaassanullu pilersaarut.
- 6) Iliuusissanut pisariaqartinneqartunut suliaassat eqikkarneqarnerat.

Imm. 2. Qinnuteqartup nammineerluni paasissutissat attuumassutillit, nakkutilliinermi oqartussaasut suliamik suliaqarnerannut atugassat nassiutissavai.

§ 37. Nakkutilliinermi oqartussaasut naliliinerat malillugu imermut imerneqarsinnaasumut pitsaassusissatut piumasaqaatinik qaangiineq ilanngussaq 2 naapertorlugu arrorsinnaanngitsunut, peqqissutisimik ulorianartorsiortitsinngitsunut killissarititassanut tunngasuuppat, aammalu iluarsiiniarluni iliuuseqarnikkut ajornartorsiut sivisunerpaamik ullut 90-it iluanni iluarsineqarsinnaappat, §§ 34-36 atunngikkaluarlugit immikkut ittumik akuersissuteqartoqarsinnaavoq.

Imm. 2. Imm. 1 naapertorlugu immikkut ittumik akuersissuteqarnermi allassimassapput:

- 1) qaangiinissap akuerineqartup annerpaaffissaa, aamma
- 2) ajornartorsiutip iluarsineqarnissaanut sivisunerpaamik ullunik 90-inik piffissaliineq.

Imm. 3. Pissutsit tunngavissaqartitsippata imm. 1 naapertorlugu immikkut ittumik akuersissuteqartoqarsinnaavoq, tassungalu imermik pilersuivimmi taarsersuingaatsiartoqartinnagu qaangiinissap sivikillisinneqarsinnaannginnera ilaatinneqarpoq.

Kapitali 10

Naammagittaalliorsinnaatitaaneq pineqaatissiinerlu

§ 38. Nalunaarut manna naapertorlugu aalajangiinerit, avatangiisinik innarlitsaaliuinissaq pillugu Inatsisartut inatsisaanni kapitali 14-imi maleruagassat naapertorlugit suliaassanngortinneqarsinnaapput.

Kapitali 11

Pineqaatissiisarnermut aalajangersakkat

§ 39. Akiliisussanngorlugu eqqartuunneqarsinnaavoq:

- 1) § 4 naapertorlugu nakkutilliinermi oqartussaasunit tamatumunnga akuersisummik pissarsitinnani imermik sukuluiagassamik atuisoq.
- 2) § 6-imi piumasarineqartutut imermi imerneqarsinnaasumi pitsaassutsimut piumasaqaatinik, § 5-imi taaneqartunik malinninnissamik qulakkeerinngitsoq.
- 3) Atortut imermik pilersuivimmud ilaasut aammalu imermut attuumasut § 7-imi piumasaqaatinik naammassinniffiunissaannik qulakkeerinngitsoq.
- 4) § 9 naapertorlugu illup imermut atortuisa peqqussutit malillugit suliarineqarsimanissaannik qulakkeerinngitsoq.
- 5) § 10 naapertorlugu ingerlatsinermik nakkutilliinissamut pilersaarummik pilersitsinngitsoq.
- 6) § 11-mi piumasarineqartutut erngerluni nakkutilliinermi oqartussaasunut nalunaaruteqanngitsoq.
- 7) § 12 naapertorlugu ingerlatsinermi nalunaarsuiffimmut nalunaarsuinngitsoq.
- 8) Piumaffigineqarnermini paasissutissamik allagaatinillu § 13-imi taaneqartunik saqqummiussisinnaanngitsoq.
- 9) § 16, imm. 2-mi aamma 3-mi imermik misissugassamik tigusiiffissanut piumasaqaatinik malinninngitsoq.
- 10) § 17 naapertorlugu imermik misissugassamik tigusiiffiusunik paasissutissiinngitsoq.
- 11) Nakkutilliinermi oqartussaasut § 18 naapertorlugu imermik misissugassamik tigusiinartut nakkutilliinartutillu iserniarnerini itigartitsisoq.
- 12) § 21-mi piumasarineqartutut nalunaaruteqanngitsoortoq.
- 13) § 22-mi piumasarineqartutut nalunaarusiunngitsoortoq.
- 14) §§ 24-28 naapertorlugit inerteqqutinik, peqqussutinik aalajangiinernilluunniit allanik malinninngitsoortoq.
- 15) § 32-mi piumasarineqartutut atuinnissamik killiliinernik, tassungalu ilanngullugu qalaassinissamik inassuteqarnermik ingerlatitseqqinngitsoortoq.
- 16) Kapitali 9 naapertorlugu immikkut ittumik akuersissuteqarnermi piumasaqaatinik unioqqutitsisoq.

Kapitali 12

Atortuulersitsineq ikaarsaariarnermilu aalajangersakkat

§ 40. Nalunaarut novembarip 15-ni 2021-imi atortuulissaaq.

Imm. 2 Peqatigisaanillu Erngup imigassap pitsaassusia aamma imermik pilersuiviit nakkutigineqarnerat pillugit Namminersorlutik Oqartussat nalunaarutaat nr. 7, 17. marts 2008-imeersoq atorunnaarsinneqarpoq.

§ 41. Maleruagassat maannamut atuuttuusimasut malillugit aalajangiinerit atuutiinnassapput, nalunaarut manna naapertorlugu nutaamik aalajangiisoqarnissaata tungaanut. Taamatut aalajangiinernik unioqqutitsinerit maleruagassat maannamut atuuttuusimasut malillugit pineqaatissiivigineqartassapput.

Imm. 2. Taamatuttaaq suliart, nalunaarutip matuma atuutilernerani suliarineqartut, maleruagassat maannamut atuuttuusimasut malillugit naammassineqassapput.

Namminersorlutik Oqartussat, ulloq 3. novemberi 2021

Kalistat Lund

Nunalerinermut, Imminut Pilersornermut, Nukissiutitut Avatangiisinullu Naalakkersuisoq

/ Mette Skarregaard Pedersen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut